

Dumonda Cahenzli-Philipp concernent teams interprofessionals en il provediment da basa

Ina da las incumbensas principalas d'ina communidad moderna è quella da garantir il provediment medicinal da basa da la populaziun en tut las regiuns. Il conclus federal davart il provediment medicinal da basa dals 18 da matg 2014 dat l'incumbensa explicita als chantuns da mantegnair e da promover la medischina da famiglia sco element essenzial dal provediment da basa. Cunzunt per pazientas e pazients cronicamain malsauns e pli attempads gioga la media u il medi da chasa ina rolla fitg impurtanta. Deplorablamain sa mussa er qua ina mancanza da persunas spezialisadas. Cunzunt en territoris periferics mancan savens successuras e successurs adattads, e pon resultar largias da provediment. Novs models èn pia dumandads.

Teams interprofessionals, en ils quals collavuran collegialmain medias e medis cun professiunistas e professiunists betg medicals, però dal sector da sanadad, pon prestar ina contribuziun en il rom dal provediment integrativ da la sanadad, ch'ins vul cuntanscher. Tgirunzas e tgirunzs fitg bain qualifitgads surpiglian incumbensas dal provediment medical da basa e distgargian uschia las medias ed ils medis da chasa. En differents lieus vegnan tals models gia applitgads cun success. Dapi l'onn 2017 realisescha il chantun Uri in project da pilot che ha la finamira da crear las basas da datas correspondentas per la politica e per la pratica. El sto er sclerir las rollas e las cumpetenzas.

Enconuschientschas da studis esters mussan in'auta qualidad da provediment ed ina gronda cuntentientscha da las pazientas e dals pazients. En territoris rurals pudess l'intervenziun d'expertas e d'experts da tgira sviluppar potenzial e crear profils professiunals attractivs. Quai pudess far frunt a la mancanza da persunas spezialisadas.

Las sutsegnadras ed ils sutsegnaders supplitgeschan la regenza da responder las suandantas dumondas:

1. Cun tge mesiras vul la regenza far frunt a la mancanza smanatschanta da medias e medis da chasa?
2. Co valitescha la regenza il potenzial da teams interprofessionals?
3. Tge premissas dovri per etabliar tals teams, e tge pon far il chantun e/u las vischnancas en chausa?

Cuira, ils 29 d'avust 2019

Cahenzli-Philipp, Tomaschett-Berther (Trun), Hardegger, Atanes, Baselgia-Brunner, Brunold, Buchli-Mannhart, Cantieni, Caviezel (Cuira), Clalüna, Danuser, Degiacomi, Deplazes (Cuira), Derungs, Ellemunter, Epp, Flütsch, Föhn, Gartmann-Albin, Hitz-Rusch, Hofmann, Holzinger-Loretz, Horrer, Jochum, Kohler, Locher Benguerel, Loepfe, Maissen, Märchy-Caduff, Michael (Castasegna), Müller (Susch), Müller (Favugn), Noi-Togni, Papa, Paterlini, Perl, Preisig, Rettich, Ruckstuhl, Rutishauser, Schmid, Schwärzel, Thomann-Frank, Thöny, Wellig, Widmer-Spreiter (Cuira), Wilhelm, Zanetti (Sent), Costa